



SETUJU ATAU TIDAK?

MELIHAT perwatakan pesakit baru ini membuat aku termenung memikirkan keputusan yang kukongsikan dengan pesakit sebentar tadi. Bukan untuk tujuan mendabik dada dan bukan juga untuk sekadar menyedapkan hati pesakit.

Setiap kali pesakit muda masuk ke kamar konsultasi dalam kepayahan bernavigasi disebabkan penglihatan yang teruk, aku selalunya akan lebih teruja dengan sejarah cerita mereka. Cuba mencari titik punca permasalahan dan cuba merungkai misteri kebutaan yang meragut pandangan mereka.

Memiliki susuk tubuh yang sihat dan anggota yang kuat, tanpa penglihatan sempurna menjadikan mereka seolah-olah hilang arah. Kemurungan adalah perkara lazim. Semakin lama bercerita, semakin dalam pemahaman aku terhadap pesakit. Kemurungan lantaran kebergantungan kepada ahli keluarga, ketidakupayaan mencari rezeki dan perasaan *hopeless* dengan tidak dapat melakukan aktiviti rutin merupakan kesannya.

Nikmat sihat itulah yang selalu disebut oleh pakar agama kita amat berharga. Nikmat sihat itu jugalah yang dikatakan *priceless*, tidak ternilai hatta jutaan harta. Segalanya tidak dapat membeli keupayaan penglihatan yang hilang. Apatah lagi andai penyakit sudah tiba di pengakhiran jalan yang tiada banyak pilihan rawatan.

Buat Puan X, pengalaman kehilangan sebelah mata bertahun lalu menjadikan beliau lebih ampuh mendepani cabaran. Namun dalam pada itu amat cemas apabila satu-satunya mata yang ada menjadi seakan malap tiba-tiba. Menjadi tunjang utama keluarga, berbekalkan semangat dan pertolongan para sahabat, Puan X menempuh hidup di Kota Singa yang menjanjikan sedikit kemewahan dan kehidupan yang lebih sempurna.

Tatkala mata kirinya mula menunjukkan ragam, tatkala penglihatannya mula diragut sedikit demi sedikit, Puan X tidak berputus harap. Kecanggihan perubatan di Kota Singa sekurang-kurangnya meyakinkan Puan X, pilihan rawatan yang terbaik ada di sana. Kembali kepada pepatah, duit tidak dapat membeli semua nikmat di dunia, siri kesakitan mata dan keradangan yang berulang memutuskan harapan Puan X untuk menyimpan nikmat penglihatan yang satu ini.

Bertahun menyulam rasa bermain dengan penyakit radang misteri itu, Puan X mahir berbicara tentang *autoimmune related uvetis*. Penyakit dalaman yang menyerang badan sendiri, askar pertahanan yang seharusnya melindungi setiap anggota mula memberontak dan menyerang balas tuan empunya badan.

Itulah yang difahami Puan X tentang penyakit matanya ini. Menarik entiti penyakit ini. Rawatan moden yang ada hanya mampu mengawal keterukan penyakit pada peringkat tertentu tapi tidak dapat melenyapkan penyakit tersebut secara total. Ubatan tidak dapat menghapuskan askar-askar badan yang ganas mengamuk meyerang matanya tanpa belas ihsan.

Dalam erti kata lain, kecanggihan rawatan sedia ada hanya mampu mengurangkan kesakitan tapi tidak menghilangkannya sama sekali. Setiap kali *uvetis* Puan X menyerang, beliau sedar beliau terpaksa berdepan dengan siri rawatan *immunosuppressive* yang berulang. Tatkala perubatan tewas dengan penyakit, butalah akhirnya. Demikianlah yang kufaham dari cerita Puan X.

“Duit saya habis doktor, untuk ubat dan pembedahan, tapi saya gagal juga menyelamatkan mata kiri. Tiada lagi wang simpanan untuk menyambung rawatan di sana. Kalau saya tak buat semua rawatan itu, mungkin saya dah lama buta,” Puan X berhiba. Aku tekun mendengar, tidak mahu mengganngu ceritanya.